


0
1cm
2
3
4
5
6
7
8
9
10
11
12
13
14
15
16
17
18
19
20
21
22
23
24
25
26
27
28




浙江圖書館



浙江圖書館



浙江圖書館



浙江圖書館



皇明名臣琬琰錄卷之十一

工部尚書程公神道碑

工部尚書劉公墓誌銘

工部尚書馮公神道碑

工部尚書蕭公神道碑

工部尚書董公墓誌銘

工部尚書侯公墓誌銘

工部尚書李公墓誌銘

工部尚書洪公墓誌銘

浙江圖書館 瑯琊

王世貞續編

徐溥

李東陽

徐溥

吳寬

李東陽

白鉞

劉玉

楊廷和



工部尚書黃公墓誌銘

工部尚書李公墓誌銘

工部尚書龔公墓誌銘

工部尚書叢公傳

工部尚書崔公神道碑

工部尚書吳公神道碑

王九思

李充嗣

焦希程

崔銑

湛若水

浙江圖書館

資善大夫南京工部尚書常熟程公神道碑

宜興徐灑撰

弘治己酉南京工部尚書程公致仕還家後三年十月八日
以病卒享年六十有七公蘓之常熟人也於是守臣以
公訃聞事下禮部謂當遣官祭葬如卹典上允之乃以卒
之明年某月日葬于虞山之麓其子惠時求予製神道碑
銘辭不獲乃按少詹事吳君狀書之公諱宗字源伊姓程
氏其先有三八將仕者從宋自汴南遷家于常熟世有隱
德至公始發以宣德丙午七月十五日生少入邑庠學業
有聲登景泰辛未進士初授刑部主事階員外郎擢吉安

府知府公在刑部治獄詳慎綽有才名時有大臣退休者
當英宗復位之初畏罪自盡怨家誣其子謀殺父不能決
法司奏遣公往訊所誣遂白吉安素號難治吏書奸弊百
出每以訟牒自裁獄成特使旁書之奸弊悉去至今郡人
論作郡者以公首稱丁父憂服闋改知真定以病未赴吉
安之民知之相卒走闕下乞公復任至則改知武昌矣踰
二年擢四川布政司左叅政進陝西布政使再轉左布政使皆有
政績民多頌之朝廷知公可用特擢都察院右副都御史
治院事尋以陝西缺巡撫即以命公適邊境多事偕總兵
官率師征洮川西番蒲松等族及往來慶陽榆林調度兵

食邊境無事再丁母憂赴京乞守制得賜其母葬祭復門
未上會木邦酋長罕罕法孟養恩六與孟密曩罕弄母子
累歲相讐殺雲南守臣奏乞調兵討之朝議以爲不便宜
遣大臣如程某者往諭乃即其家賜以璽書而行公被敕
旨論之折其辯說及見曩弄復責其擅相攻擊之罪皆頓
首服乃以具奏始設孟密安撫司以材寨歸木邦不相統
攝而西南遂無事矣朝廷嘉之轉公左副都御史加俸一
級仍巡撫雲南贊理軍務久之召為刑部右侍郎尋轉左
侍郎以尚書缺署掌部事能律以法部中肅然九年考滿
始拜南京工部尚書加一級俸公至是雖老益勤允工役

材用計度精詳無所濫費人方望公文任則致仕而歸且
卒矣公之曾祖伯高祖仕迪父景和皆不仕以公貴贈祖
父都察院右副都御史妣皆贈淑人配譚氏封淑人子男
五曰恩國子生惠志感皆義官懋邑庠生女一孫男七公
居官見於前所叙述者其大畧如此若其持身之謹待人
之厚人皆知之不待書也嘗預同考會試專別得士為多
喜為詩有宦游撫夷集藏于家銘曰壯哉海虞為吳上縣
古有名賢文學肇見歷世既遠益多聞人有美程公出為
名臣少學于家遂顯科第即署初登刑無偏諉吉惟大郡
爭訟為嬉以公出守吏不敢欺自蜀而秦以公分省政譽

日騰巡撫是命乃長憲秩公才實優西戎即叙士卒歌謳
乃撫南蠻乃息其忿片言折之兵不血刃久勞于外帝實
念公有使召入馴至司空積勞既久而病斯作奉身還家
晚歲之樂何棄斯世訃音忽來卹典爰降誠爲死哀視其
後人多而蟄尙以致之公有明德海虞之野有山巍然後
識其藏司空之阡

浙江

五



浙江圖書館

南京工部尚書謚文懿劉公墓誌銘

長沙李東陽撰

公姓劉氏諱宣字紹和一字應召其先世家南康有諱君
造者仕南唐為吉州推官始留居安福祖諱孟勤考諱祖
昭俱贈太常寺卿公八歲而孤長值家難力就學受春秋
于禮部侍郎李公紹正統丁卯補父戍盧龍徒步學京師
冬無續手足皸裂忽凍死道士有老嫗飲以羹始甦夏嘗
中暍有遞夫以熱土覆臍摘園瓜食之乃復進己巳北虜
假貢獻圖窺伺公上疏言虜不可信宜豫為備後六師失
利公從武官守天津密贊戎事或誘之逃或留妻以女皆

弗聽事定乃返景泰庚午例得校藝京闈巡撫都御史鄒
公來學竒公才曰子必為解元聞者皆笑比試果第一名
擢起辛未會試第九舉第二甲進士簡入翰林為庶吉士
壬申授編修癸酉代祀北鎮丙子修寰宇通志成遷修撰
天順戊寅歸省母彭淑人迎養于官庚辰同考會試壬午
典京闈鄉試人服其公甲申憲宗即阼命克經筵講官丁
亥九載秩滿擢春坊右諭德尋以英宗實錄成遷右庶子
庚寅擢南京太常寺少卿上疏請增置大廟寶座更造進
鮮船定樂舞生名數圖畫功臣諸廟數事多見采納丙申
丁母憂己亥還任壬寅進本寺卿掌國子監事修立條教卹

病賻死士類悅服琉球國遣子弟就學公據例請給薪米
衣被撫之加厚學者奉束脩金公辭弗受丙午召入爲吏
部右侍郎學者復申前請事聞乃命公受之公在吏部每
留意人才政務畢舉丁未旱代祀北嶽北鎮祀畢而雨弘
治戊申今上皇帝特遷左侍郎庚戌進南京工部尚書刻
姦弊稽出納償官逋數千而羨倍之辛亥七月十日病疽
卒壽六十七公事母孝待寡嫂以禮鞠兄女有恩性耿介
好折人過人亦以此重之熟九本朝典故能歷數公侯世系
成化初禮部議慶成宴坐尚書姚公夔詢公公歷舉舊制
某官坐某所姚據以上奏行之至今為文務理勝所著有

冲澹集藏于家配王氏累封淑人側室史氏王氏朱氏子三長
秉常朱出以公蔭為國子生次縣學生秉善又次秉監皆
王出女四出王淑人者適國子生廬陵周珪史出者適同
縣彭邦賓王出者適朱元福朱出者幼未行女孫一士子
二月十九日葬廬陵南塘辰巽山戌乾向毋墓之左上遣
官治葬事且賜祭云東陽公京闈所舉士也故秉常來乞
銘東陽其忍銘公亦曷敢不銘銘曰六卿分職兩曹並舉
公居兩曹實掌邦土天子曰咨作我肱股乃身在外心實
予輔諸吏奉法群工信度天子曰都是咸在汝公在吏曹
為衡為權公在大學有身有言文為國華公在詞垣繇終

溯初亦罔不賢天之培之以歲為年國有耆舊若龜筮然
胡生之韜而弗其延我叙公行揚幽賁玄誥命有章諭蔡
有文君恩在茲過者式焉

浙江圖書館

浙江



浙江圖書館

資善大夫南京工部尚書蠡吾馮公神道碑

宜興徐溥撰

公諱貫字大用保定蠡吾人也曾祖守道元西臺御史祖
彥章皇朝洪武中人材仕富平縣主簿考古以公貴贈大
理寺卿公少起田畝年十八始知自奮於學正統己巳之
變士民驚潰失業公誦讀不廢及領鄉薦入國學貧無膏
燭夜每挾冊隨月光晦則燎薪以續明其勤如此登天順
甲申進士授監察御史嘗出巡邊關按州縣搜吏弊索民
隱貪廉才頑多見褒黜成化中上䟽言時事曰慎爵賞卹
窮民處流移修兵政廣儲蓄禁盜賊平刑獄息邊患節冗

費重憲職數事上嘉納之及掌三法司事治山西妖民及
劾兵部大臣大法事聞者肅然九年進大理寺右寺丞轉
左寺丞進少卿不數年遂擢都察院右副都御史又改大
理寺卿法律精明而持心仁恕嘗曰大理平天下獄獄之
不平咎在誰執故當奏讞必反覆訊鞫無憾而後已每廷
議參酌得宜其言多載在條例有司至今遵行之嘗應詔
舉所知衆稱得人弘治六年拜南京工部尚書九年以疾
乞致仕詔可且命馳驛以歸抵家一月而卒九月二日也
壽六十有娶李氏四繼王氏並封夫人子男四綺純繪纓綺
純太學生女二孫男三公魁岸羨髯為人詳審冗靜而有

謀謨度量汪如莫窺其際在大理嘗承詔會同三法司錄
囚有餼羊上尊之賜會勘肅府汾川王承奉及廷試為讀
卷官皆有寶鏹之賜弘治改元上太皇太后及皇后徽號
誥封二代皆三品又有白金文綺之賜及卒上遣官諭祭
治其喪葬其亦可謂榮且哀矣以十月某日葬于某山之
原其從孫吏部考功主事蘭為狀致其諸子之意來乞銘
予與公同官朝頗知之詳而狀之出處治行歷履始終亦
備矣因述而復之俾鑿諸墓道以為他日過者之式焉故
銘之曰蠡吾之野馮氏居焉否而泰來生公挺然如復茂
林有木拔起匠石見之謂之杞梓材則可用用無不宜登

庸于朝惟所任之昔領鄉書膺薦而至遂取甲科揚揚其
氣銓曹慎簡置于內臺庶行其志不枉其材侃侃在朝職
司風憲有所獻納從所聞見乃擢大理審克惟刑累官廷
尉折獄益平帝曰勞哉刑實無誤汝其少休曰有留務周
建宏父是為司空掌土之職爰以畀公祿既益豐心則加
畏丐歸何過以避名位豈惟知幾命亦自知故居稅駕門
有靈輻生受榮名沒膺卹典設祭營墳出于宸眷首丘之
願獲遂所圖鬱往城巍巍蠡吾伐石刻銘樹茲墓道子孫
繼之百世有耀

資善大夫南京工部尚書泰和蕭公神道碑

長洲吳寬撰

弘治庚申南京工部尚書蕭公以老疾上疏乞致仕上知
公賢不允所以慰留者甚至閱二月疏再上其詞加切始
允之特命乘傳還鄉仍令有司供食後之用從厚亦異數
也公望闕咸激曰老臣死且至矣恩典若此將何以報之
抵家之明年疾復作竟卒實辛酉三月十六也享年七十
公諱禎字彥祥姓蕭氏世家吉安之泰和為著姓邑中稱
仕族入國朝仕者不絕然無甚顯者公幼失怙生有高資
能自奮於學期必取科第游學于外族人有隸尺籍于蜀

中者往依之學成弟子多從受業然益困無所遇儵然西
歸舟行峽江偶墮深淵中自分必死矣忽若有物扶其足
而起適得漂櫓負而登岸人異其事謂公後當顯竟以儒
士舉于鄉天順甲申遂登進士第成化乙酉授南京刑部
貴州司主事己丑陞湖廣員外郎治獄明決爭訟者一訊
輒得其情懷律剖斷庭無留獄人皆稱之壬辰擢湖廣按
察司僉事分巡一道明決如在刑部時所至郡縣興舉廢
墮尤好獎進人才敦勸民俗不專以簿書為事俄苗寇竊
發詔出兵勦之文武大臣或不相能公適以事在軍中曰
自古未有大臣不和而能成事者况用兵又事之大者乎

為反覆開解大臣感悟寇卒平公當紀功則有以婦女首
級徼功者辨其偽斥之及奏捷加四品俸吉王建國長沙
公復督工役一時夫匠被人擾害者賴公以安巡按御史
累奏公治績辛丑擢本司副使丙午再擢按察使於是蒞
湖廣者歲久治績愈著名益起明年遂遷河南左布政使
至則宣上德究民隱尤不肯以公錢曲奉權貴人人以為
難戊申為今上初年會陝西缺大臣巡撫朝廷即以公為
都察院右副都御史賜敕得以便宜行事陝西當凶荒之
餘民初復業公加意安輯流移者益至乃內務蓄積外為
備禦兵民晏然四方殆無事歲當慮囚得可矜疑者悉置

輕典奏上因多冤枉死公作全命錄以著朝廷欽恤之意
然是時一裨帥犯法素有聲勢為請託者多卒論如律復以
平寇功蒙恩有文綺寶鈔之賜辛亥遷南京工部右侍郎
甲寅改刑部丁巳始有工部尚書之命南京為舊都凡壇
廟宮闕城垣橋道歲久漸圯脩治無虛歲公計夫匠量材
物役用必當未嘗妄勞費權貴人有乘時求利者往往無
所得每工功告成輒蒙恩賜以酬其勞上將久任公甫三
年則公以老疾去而卒矣曾祖廷翁不仕祖維翰考楚紳
皆以公貴累贈資善大夫南京工部尚書祖母袁氏母羅
氏皆累贈夫人公有兄二人曰彥享彥清俱出前母歐陽

氏及羅夫人生公憐其幼弱折與田產特厚後夫人卒公尚少悉讓還二兄取舊券焚之親黨若故刑部尚書劉公廣衡而下率譽公以為不可及公壯且貴痛念父母不及祿養過塋域輒慟哭如初喪念叔祖志翁無後塋域蕪廢為脩飾而歲祀之居家作敦本之堂及置祭田以供合祀祖先之費至於處宗族待故舊其心必歸於厚也若其歷官四十年田廬僅足服食不移於物無所玩好公稍暇惟讀書賦詩而已其德之儉又如此娶同邑太原周氏累封夫人有賢行為公屢納妾無子公乃以兄彥清之子彌為後彌以公蔭為國子生孫男二曰益日善女一許嫁曾某

公卒後弼來告哀上復念公諭祭治葬皆如卹典將以壬戌某月某日葬于里中把塘其地公所自擇也今都察院左都御史戴公工部右侍郎張公皆為公同年知友弼往告曰先人於法得樹碑神道敢圖所以刻于石張公乃為狀授之而戴公則卒之來請予謝無暇而請之益力為序而銘之銘曰吉有蕭氏著稱于時昔有灑源徒家龍陂延歷數世如木分支載培以溉始大發之惟大司空為時偉器孤童業儒志向已異宦學有成豈假人致登名賢科起家即吏法家流刻而少恩哀矜勿誤如切吾身敝歷所至濟以慎勤凡吾所馭莫匪斯民名與祿崇德及位顯留務

則多志克大展疇咨若采古難其才工役屢成山有餘材
西墮大江浩然去志公身可扶何隔斯世帝念老臣恩典
嘗頒不終享之已蓋其棺陳其牲醒治其塋域邦國之典
郡邑之職嗣續有人喪服纍然以予以哭賓客連連國無
耆俊鄉之名賢何以考之刻石于阡

浙江圖



浙江圖書館

資政大夫南京工部尚書贈太子少保謚文僖董公
墓誌銘

長沙李東陽撰

今天子右文圖治每軫念舊學侍從之臣倪文毅傳文穆
二公卹典特異比董文僖公訃聞命有司祭葬如制而特
贈為太子少保文僖其賜謚也按董氏世居贛之寧都會
祖諱子平隱于鄉祖諱吉義贈南京禮部右侍郎考諱時
謙累贈翰林院編修右春坊右庶子而加贈如其祖祖妣
某氏贈淑人而妣溫氏封太孺人贈宜人加贈亦如之公
諱越字尚矩生五歲失怙為母氏所鞠比弱冠極力共養

以其暇學舉子業補府學生天順己卯舉鄉貢試禮部輒
不利卒業國監攻苦力學雖敝巾垢服名隱隱起儕輩間
成化己丑進士及第初命為編修乙未戊戌皆同考禮部
時稱得人丁內艱歸用禮褻事舉先世田業讓其兄睦處
宗鄙不以貴加人人無問疏戚貴賤皆樂與之親有訟者
懷金以請笑而却之亦不怨也九載考最進侍讀癸卯典
京闈鄉試甲辰直東宮講讀丁未充經筵講官尋以登極
恩進右庶子兼侍講會朝廷頒朔于朝鮮特命公奉使賜
麒麟服以行至則宣德意正王度餽贈無所受居三日而
還乃作賦以紀國俗他所題詠尤多國人鋟諸梓以傳弘

治己酉典試南畿辛亥脩憲宗實錄成擢太常寺少卿兼
侍講學士壬子進日講敷奏明暢義歸于正上每為注聽
久之賚予尤數癸丑擢南京禮部右侍郎公博古典習聞
本朝故事而職務清簡無繇自見大夫士議禮者多取決
焉三年考績京師時其子天錫已舉進士留累月乃去拜
南京工部尚書凡上供服器藩王張具暨都城內外土木
之費日旁午不絕公應之綽然有餘平生為文章歌詩典
雅優裕無煩雕琢至是猶不廢著述積所得為圭峰稿若
千卷壬戌五月七日以疾卒距其生宣德辛亥二月十六
日壽七十二塋以癸亥某月某日其地曰某山之原娶溫

氏毋族也世有內行子四長天叙賜冠服其次為天錫又
次天毅以廂為國子生天申縣學生女一適何蘭孫六韓
柳歐蘓遷固女孫數亦如之公修眉長身骨格清聳雅談
健步老益彊力而性行恒固量度優遠識者謂為壽考之
相不意其遽止此然校諸恒筭所及亦已多矣矧子姓蕃
衍其賢且貴若天錫者又克肖如此哉予與公同在翰林
同校國史直講筵相視甚厚比有哭予之戚公屢致弔慰
訃至之後蓋猶有遺音焉天錫以治命請予銘其狀則南
京戶部侍郎鄭公廷網所著也銘曰謂成之艱久若易然
東隅桑榆惟公有焉謂壽之繇而不其延垣塗摧車抑又

誰愆虧盈益謙天道則有栽培傾覆人所自取數或弗值
理則可守其所未竟以遺爾後古有論是匪祿壽為公有
令聞如璋如珪亦有良嗣為表為箕公無憾哉公世在茲

浙江圖書館

浙江圖書館



浙江圖書館

榮祿大夫南京工部尚書保定侯公墓誌銘

南宮白鉞撰

正德丁卯冬十二月七日南京工部尚書致仕侯薨于京
師之寓地距其生宣德丁未冬十二月十三日享年八十
有一先是公季子南京太僕少卿觀以迎侍不便拜疏乞
終養朝廷嘉而許之至是觀以薨聞上命有司諭祭營葬
所以飾終者甚縟卜用明年戊辰三月十九日祔于先營
之次謂鉞辱交公父子間以墓銘見屬於不敢辭則叙之
曰公諱瓚字奉璋先世家諸城永樂初徙閭右實畿內遂
以族行占籍保定之雄縣公幼而穎異從江右李庸脩學

詩邑博士見所業文嘆曰破天荒者必此子也力勉游縣
庠景泰庚午領順天鄉薦甲戌擢進士第丙子授戶部
西司主事天順庚辰湖廣歲饑流移載道公奉命往賑為
免稅糧八十餘萬石民困已蘇壬午陞員外郎董西征餽
餉經理有方自良鄉抵陝右數千里飽馬騰而民不告勞
冢宰尹公旻重公才以遠大期焉癸未陞鳳翔知府鳳翔
頻年荒儉人至相食公下車即發倉廩以賑窮乏散粥糜
以濟流寓所活以萬計既而通政人和百廢漸舉郡以大
治郡之役莫苦於邊運官吏復挾私而輕重之公乃揭冊
量派夙弊悉除迄今尚遵其法壬辰陞山西右叅政老稚

攀擁幾不得行丁酉陞光祿卿尋丁內艱庚子服闋改左
僉都御史奉勅巡撫甘肅甘州衛所以虧折芻糧建繫指
揮以下餘八百人歲久物故五之四而完未有期公為躬
閱舊牘俾隨多少各償其半數日盡釋大酋速擅阿力侵
逼哈密殆不能立國公召赤斤蒙古二衛授以方畧克復
刺木等八城俘馘千五百餘公弗有其功兵部為白于朝
降璽書嘉諭癸酉巡邊虜遁入寇力戰敗之兩賜銀幣甲
辰陞兵部右侍郎考選京衛軍政官黜數百負無少假借
由是忤當道未幾調南京禮部丙午陞戶部左侍郎歲省
河下兌支輦運費一十二萬石貯為賑濟備弘治辛亥陞

南京工部尚書癸丑奉勅改兵部恭贊機務考選留都軍政
持法一如甲辰復改工部俄以老乞骸骨孝廟知公守正
寡與慰留懇至章再上乃得請且命馳以歸蓋異數也既
居閑閉門却掃日以教諸孫為樂乙丑奉詔進階榮祿大
夫公資稟剛介踐履篤實資議表偉然望之知為魁人距
公平居不妄言笑尤慎交游至臨事裁決則操持堅定務
求其當論者以為得大臣體國初以來雄之士未有登甲
科者有之寔自公始其後戊戌觀甲辰泰接武而起父子
兄弟名顯一時光少傳恭敏公知最深先公薨既久鉞每
謁公畢縷縷道舊故不已繼則嘆曰前輩風采不可見矣

日月幾何豈知公之所嘆今遽以嘆公也公曾大父諱世
昌以隱德稱大父諱文質為遷雄之祖父諱林親藩帑使
大父父皆贈資政大夫南京兵部尚書祖母柳氏母王氏
皆贈夫人娶王氏贈夫人子男五長泰刑部主事次豫義
官皆先卒次即觀宦學有聞駸駸矣次翼國子生次幼亦
先卒女二長適戶部尚書殷公撫之子中府經歷璋次適
戶部尚書李公衍之子光祿錄事鶴孫男七詳訥國子生
謙俱先卒讓謚說誥皆業儒孫女三武學生李尚忠鴻臚
序班郭晟其婿也次在室曾孫男二女一銘曰惟山出雲
惟雲沛雨惟體之碩惟澤之溥巖巖侯公庶其象此尔丘

班固
尔埳疇能與侶侯公顯允揚于王庭東曹振譽西郡流聲
都臺司馬八座峻升倚司留鑰南邦用寧為國元臣不侈
以大進退從容名倫攸賴天寵荐加錦袍玉帶榮養高居
繁祉是介壽開九秩大運告終淵表震悼褒卹兼隆堆陽
有麓永闕玄宮勒辭貞石垂耀無窮

浙江

圖

資政大夫南京工部尚書南崗李公墓誌銘

萬安劉玉撰

皇明列聖以至治圉天下熙洽涵濡至弘治極矣方是時
孝皇帝以盛德作于上為之宰輔者類皆宏材偉器得人
之盛與宋慶曆諸君子比隆若南都大司徒睢陽李公其
一人也公諱孟暘字時雍別號南崗世為睢之長岡里人
祖諱都不仕考諱斌歷渭南推縣丞俱以公貴累贈都察
院右副都御史南京工部尚書妣張氏繼岳氏俱夫人公
以宣德壬子生于渭南官舍八歲入小學十五受尚書天
順壬午中河南鄉試遊太學取天下英俊為麗澤交名籍

甚會司成邢公被謗公率同例上書辯誼振於一時成化
壬辰登進士戶科給事中癸卯盤糧大同值虜寇入邊危
甚歸陳邊備十事所陳民壯事著為令甲辰使占城時占
城為安南所侵其王為安南所害朝廷遣使封王之弟齊
亞麻勿菴未至而勿菴死其臣提婆答者攘所封印故復遣
公封王之次第古來公行上言占城險僻安南之構未靖
而提婆答又嘗竊據萬一弗順損中國威宜縱其來使傳
命古來仍勅安南悔過上悉從之乙巳進擢兵科都給事
中留廣中數年卒致古來厓州而定其封弘治戊申始歸
陳地方五事曰懲舊弊以脩軍政設兵備以鎮邊方開衙

門以散嘯聚脩城垣以禦寇患通朝報以廣德意多見採
納尋擢湖廣左叅政常德歉民饑公分守其地戢盜賊抑
豪橫通米商禁藩府之苛革里書之弊用蘇其民庚戌晉
廣西左布政使屬夷獠為訐而廩食多匱衆口囂然公亟
遣官糴諸遠而實之軍餉以給乙卯遷都察院右副都御
史提督南京糧儲奏脩官廨以便分理折支勲臣祿米以
省轉輸戊午轉南京戶部侍郎壬戌晉拜工部尚書中官以
宮殿傾圮欵脩之屢詣公言公徐曰萬世不拔之基已有
定所脩此何為議乃塞南畿織造多取資蓄課歲久塞勢
家所侵公一清之於是課增用足而民不擾言者又以災傷

欵併蒔課蠲之公獨以為蒔洲人所爭佃其利可知苟蠲
其課而國用不足則將加派於民是損本實而益浮蠹也
抗言尼之雖掇怨不借正德丙寅乞致其事疏三上而後
獲允有清慎老成之褒錫結給驛月廩歲隸恩數甚優自
後權奸用事士夫保全者鮮公知幾矣哉己巳公薨于家
享年七十有八辛未賜祭葬壬申二月卜吉于城西二里
之原配王氏繼室紀氏贈封夫人弟孟狂與公聯甲第歷
官憲使予天叙克家先公卒女四人天叙旣卒僉議以憲
使公仲予天端後公今國學生是為公嗣而天叙所螟予
曰用章今州學生是為公孫公性坦易襟度恢宏己之善

不吝於人人之善若有諸已書所謂其心休休焉其如有
容焉者公之謂歟所著有南崗吟稿三卷睢州誌一卷奏
議一卷存于家嗚呼王不佞早辱公愛至深恒竊感知已
莫知所以報之迨茲蒞學公沒已再期而發引之辰予適
至睢遂獲與於執紼之末若有數焉於是少叅徐君以黃
門蔡君天祐所狀事屬銘予弗敢承也甲戌予遷閩臬徐
君以紀夫人之喪來告且曰啓壙以俟銘可緩耶義不可
復辭乃序而銘之曰峻極者嵩嶽惟土中流河濟汝萬壑
其東倚睢陽公允茲秀鍾磅礴芥胃中八九雲夢聖典是
宗百籍旁通沛哉辭鋒秋湛春融振武庠雍譽問日鴻穎

脫南宮風嘯雲從給練惟聰方岳匪躬臺寔滋隆司徒司
空有執有容日猷日庸力挽鴻濛潛裨化工權究構凶超
然赤松壽考從容哀榮始終勒銘幽宮愧予雕虫寵光所
蒙尚試無窮

浙江圖書館

明故南京工部尚書致仕進階榮祿大夫贈太子少
保謚簡肅黃公墓誌銘

公諱珂字鳴玉姓黃氏上世楚崇陽人元季四世祖始徙
居遂寧大父諱鑑父諱宗泗以春秋舉鄉試授雲南大姚
縣知縣有惠政鄉人稱為南庄先生俱以公貴贈資政大
夫南京工部尚書祖母馮氏母劉氏俱贈夫人公少時嘗
從南庄于大姚警敏嗜學姚安守竒之令與諸子共學因
謂南庄曰賢郎廟堂器也既歸為學宮弟子成化十六年
舉於鄉二十年第進士授湖廣龍陽知縣其為政大要以
立程式均徭役禁豪橫興學校息異端除奸弊為首務劇

賊流劫湖中公密遣兵壯授以方畧不旬日盡掩捕之時
湖南大侵獨龍陽熟往就食者相望公設厰四境煮粥以
食之所全活者甚衆部使者列上其治行徵命且下會有
劉夫人之喪闋十月南庄亦卒囊無長物至不能舉葬事
弘治六年服闋不外補特授陝西道試監察御史居一年
實授九年按貴州因其土俗之甚者乃繩以法金達長官
何論父子負固將作叛公以計擒之削職處死易沅官他
桀鷲者始懼及按順天等府公曰是多貴家驕橫不可以
貴州之治治也裁斷一主於法無所假借太監陸愷誣奏
人隱占公田下錦衣衛獄有榜死者公劾之太寧都指揮

康淵附勢怙惡詆毀巡撫憲臣公建於理遂鑄其職壽寧
侯家河間故有 賜田欲并其旁近膏壤得之遣内外官
勘量將與之公言民貧事不可奪事乃寢尋督脩 皇城
因事革弊無或敢抗者值隆冬 上特賜革撥一袋且謂
侍臣曰御史勞矣成工復 賜晏勞十五年貴州有米魯
福佑之變 朝廷出師討之命公監其軍酉陽保靖諸土
兵素無節制公召其酋長諭以軍法乃無敢剽掠者軍中
土功百方審驗一夕就寢如聞婦人哭聲漸近索之不得
明日果有殺民婦報功者立送軍門斬之班師守臣厚有
所饋公峻拒之既而賞雲南視貴州獨厚公既言之始並

論其功奏復加俸一級尋轉山東按察司副使巡察海道
飭武備嚴守望山賊竊發輒勦除之封內無警正德三年
陞山西按察使斷獄明允多所平反藩府承奉有罪至死
者王為求疵不得竟抵以法守藏吏以羨餘獻公斥之退
明年擢右僉都御史巡撫延綏虜犯城下公身親督戰所
部勇躍自效賊敗去亦不刺再之威武寧塞二營堡公發
遊兵千騎禦之斬捕三百五十餘級時謂十數年來未有
此捷嘗以歲例饒荒天忽陰翳風氣慘烈公曰此虜氛也命
輕騎數百伏山背賊果率衆突出我軍伏起殺之殆盡將
佐皆服公善料敵自是虜入寇輒失利掠常州歸要擊又

敗之盡棄所獲人畜宵遁邊士月餉故有扣除之弊公痛
禁之其羨餘悉貯之官以備支用士皆足食寘鑄作亂傳
檄以誅逆瑾為名三邊騷動公用間其偽檄密奏於朝
且陳八事謂寧夏城中有慶王在內人效忠義者多請早
出兵以伐其謀而奪之氣固原官兵宜過河防守請增設
憲臣總制軍務嚴守備飭兵馬定召募賞格選州縣民兵
以助王師赦何錦丁廣部下以開自新之跡速賞近有功
官軍以勵人心奏上多見採納隨遣總兵侯勛叅將時源
分守黃河扼其要害賊聞之不敢出遂至於敗先是瑾請
遣官覈沿邊屯地各鎮畏威奉行唯謹遂有寧夏之亂獨延

緩遲之民賴以安瑾嚙之又怒其封上偽檄亟欲中以奇
 禍會敗獲免然亦為其倚據再罰米至五百石矣 召為
 戶部右侍郎提督倉場七年河南用兵 命公總督糧餉
 時兩河屯兵號十餘萬且進勦奔逸卒難應給公隨地轉
 輸未嘗告乏每獲賊徒審其脅從者輒釋之有司以官馬
 獻諸將或送首級為從人功皆不受論功再加俸一級廕
 一子為太學生是歲改刑部右侍郎流賊獄成事者議欲
 法外用刑公詣 左順門執奏當遵 祖訓中人諭以
 上意公猶固爭之八年陞左侍郎奉 命勘鄒平子爭襲
 事公以二子皆庶出幼者法不當襲乃從禮部原議奪之

以歸其長原議今閱學費公在部時所主也明年改兵部
右侍郎滾濠乞護衛公不受賂且執議再四謂奸萌漸不
可長文移獨不署行示決不可與也尋轉南京都察院右
都御史會審重獄有寡婦為其族人誣與姪姦守備中貴
主之利其財也以嫌無敢辯者公辯而釋之十年考察庶
官事竟自劾乞休不允以萬壽節入賀因乞歸展祭給
釋以行十一年陞南京工部尚書時營造上供器用多出
額外公節財用程力校工雖細微無或乾沒者三載考積
既得馳恩遂乞歸至是疏凡四上矣上念其懇切許
之賜勅給驛仍命有司月給廩三石輿隸歲三人公喜

日吾幸完吾名矣何以為 聖明報 今上登極之元
年以 尊號推恩進散官一階十二月一日卒于家訃聞
贈太子少保謚簡肅 命禮部諭祭者再工部治營域異
數也公英毅閎爽遇事有決斷治律精明不事苛刻所至
皆有聲稱居家孝友劉夫人性嚴公事之得其權心弟珮
早卒撫其遺孤如所生瑛見背於南庄最幼携至京師教
之以至成立與人處傾蓋即如故舊至遇負氣好勝者則
歛退不校待鄉人亦有禮常曰人貴知足條忽百年貴賤
同歸於盡耳何必事事求如意也談論同日聽者忘倦同
官有行部于外者每告之曰吾儕為此官不可作意去人

官爵以立己名得罪於法者不可容于我有忤者不必計也守官廉介而樂施好義宗族之貧者婚嫁皆仰給於公致仕後日遊南津別墅招親舊嘯咏為樂每遇北來人輒問時政或不如意終宵不寐曰天下有事吾獨得安枕乎易簣時一無所屬但齟然大笑而已公在官三十有六年從事多勞受勅獎諭者前後凡四金幣之賜不一而足其生正統十四年十二月十二日得年七十有四配張氏福建鹽運司同知諱睿之女累贈夫人繼聶氏黃梅主簿諱新之女累封夫人子五人張出者二男嵩縣學生女歸太學生王錦聶出者三男華太學生女峯歸予子翰林脩

撰慎孫男五若槐太學生若桂陽孫庚孫申孫孫女一堊
以卒之明年 月 日墓在邑城西土橋山之陽先事畢
以其兄之命奉翰林席檢討仁同所述狀乞予銘夫人臣
事君臨利害遇事變乃見其節公於寘鐸宸濠之事其大
節何如也法當銘銘曰 春秋飾吏傳家學寵陽之理寬
以約中臺論奏稱謬諤再持憲節問民瘼惠不保姦威不
雪一劍提兵光濯濯紀律為鋒信為謬纍纍脅從解其縛
忍使無辜膏鑊 璽書褒諭仍進爵邊防民隱兩盤錯隨
手決斷無隴斷齊東晉鄙皆膽落超授中臣撫河朔倉卒
變從寧夏作驛騎先馳上方畧河外屯兵拮其角應之在

內折元惡召副司徒專管籥遠督軍儲餉伊洛救民水火
功利悽逆番請衛勢如燦公不為署見何確留都臺省連
簡擢年至歆歸陳請數南津之園不獨樂鄉人考德有覺
無何乘化善人愕節惠之典優且渥其不朽者銘是託

浙江圖

浙江圖書館



浙江圖書館

光祿大夫南京工部尚書隴州李公誌銘

漢陂王九思撰

公諱善字宗元家世隴州人也其高祖曰公賜仕為高郵州
知州魯祖惟中贈文林郎浙江道監察御史祖昇由國子
生拜浙江道監察御史擢浙江按察副使父溥亦國子生
不幸任為庾宰後以公貴封文林郎南京廣西道監察御
史母馮氏封孺人太孺人生四子公其第二子也公少穎
悟讀書善誦不忘父封君愛之遣入州學為弟子員授
易知州陳君者江西人陳君善知人于諸生獨竒公貴甚
然氣豪而貌瘠諸生聞言或目笑之不信未幾果舉成化

丁酉鄉試明年戊戌舉進士授行人司行人出使慶府王
 以金幣贖不授行人三年選為南京廣西道監察御史是
 時太監梁芳陳某怙寵市權而南京太監郭鏞亦橫擅入
 後湖公與同官繆擣苛上疏極言雖不報然三人者寵由
 是衰矣尋出清理江北諸郡尺籍劄弊剔嘉以影射出者
 八百人有奇弘治戊申以父喪歸終制改浙江道出按遼
 東是時總兵官羅雄偷安弛備太監常朗縱其舍人侵漁
 軍餉奪人妻孥聞公至即懼不敢復為都督王鑑孫貴皆
 以不職劾罷傳玄者逆旅舍主人也嘗主貨即李林林不
 知所往林子頌殺林有司抵玄死獄成然林實向沽酒婦

所飲醉婦與姦夫謀殺林死利其財公廉得其情玄以不
死及代歸而壽寧侯鶴齡方負勢莫敢誰何族子舍人下
上運河沮擾貿易拷掠無辜謗怨載塗至是有訟者會在
公公曰教授候門之鈴鈴弗嚴故至此矣于是參其教授
姚倫就問教授懼走匿侯所不出公于是劾侯出教授就
問乃候家以罪發戍者若干人京師遠邇譁然皆知有李
御史也然候實不堪復未疵撻拾公天子震怒欲置于理
是時在司禮者若陳寬一二人皆識體苦為諫止無事吏
部見若此恐終不免遂擬陞河南按察僉事云而都指揮李
賢者守備嵩廬濫受民詞納賄無厭會公分巡河南道乃

劾罷去是時河決張秋都御史劉公大夏與太監平江伯
偕來督脩乃求綜理其事者藩臬以公應公為相度水勢
開修賈魯河四十八里改河南注築塞黃陵缺口百十餘
丈斷水東流功垂成復決公僅以身免乃更脩數月功乃
成詔陞俸一級未幾太孺人卒乃歸其後復除湖廣分巡
荆襄荆襄間往往多伏孽扇亂者至是有何淮者與其徒五百
人僭號稱王攻陷城池劫掠鄉聚居民大驚恐不可撲滅
呂高者襄陽衛指揮也善捕賊公以委高而身自微服出
入賊窟中覘賊以計擒獲之事平詔陞俸一級其後王景
陽者亦荆襄人以左道惑其黨熊彥和以子妻之兩人皆

稱王謀入襄陽內亂未發而公覘知之亟遣呂高往捕得
彥和等及其妖書解京師其脅從者五百人有姓名籍記
公焚其籍不間在湖廣二年擢山東按察司副使兵備臨
清一日報錦衣衛千戶劉海與一校尉乘舡至聲勢甚大
公見而疑之執劉海下拷問對曰我京師人魯貴也校尉
僕魯喜耳曰劉海詐也聞者咸以公為神在臨清五年擢
山西按察使是時晉王寵宦者門副劉茂茂倚以為奸凡
府中金貨輒匿衆無敢言茂與府中人李成有隙作以王
命逼成幾死成訴之巡按下公問于是捕劉茂茂急附王
王為之請不從竟捕劉茂茂死其後劉謹用事欲為茂復

讐然公自防甚密竟亦不能害也正德丙寅擢四川右布政使未幾轉左四川番夷久肆標^掠百姓患苦之巡撫都御史鎮守太監因民之不忍具奏出師征之公請于鎮巡曰當用兵幾何曰非十萬人不可公曰民力殫矣番未平而內變作矣非計之得者也曰業已奏請柰何公曰征未晚也番聞我師至必懼不若因而移檄宣布朝廷威德讐服其心從其撫降之亦萬全之策也于是檄番果降誓死願為良民不敢復叛捷聞天子大悅賜公襲衣白金尋拜南京都察院右副都御史會同吏部考察南京庶官甚平乃自引乞休天子不許慰留之轉南京刑部右侍郎會同尚

書缺員獨理部事獄死囚三人將行刑公以未經覆奏止
之明日邸報至三人者移江西巡按御史勘問衆皆歎服
庚午超拜南京工部尚書公以冬官大司空職掌邦土居
四民時地利位高任重不可但已會脩孝陵及懿文諸寢
殿皆公會計甚悉未久疾作罷歸是時公年未滿七十才
不究用識者限焉比歸而其子守經先已買田築室及諸
游樂亭池之勝竹樹花卉魚鳥之趣無不畢具公處之怡
怡然不知老之至也辛巳夏天子新即位覃恩臣下于是
有司問勞公具羊酒綵幣尋又奉詔進階光祿大夫鳳翔
知府路君直賀以玉帶羊酒又五年而嘉靖乙酉八月疾

作是時次子守純赴試省成矣公以為歎亟歸明日終于
正寢是月二十六日也距生是正統甲子四月初六日享
壽八十有二歲云配夫人周氏封孺人先公三年卒女德
甚備具在墓表語中夫人生子守經錦衣衛冠帶總旗加
七品散官亦先卒一女適醫學典科閻劬蓋蓋同邑叅政
公之子也則室鮑氏生二女一適鳳翔叅政張公之子珂
一適舉人閻佳劉氏生三子一女子守純州學生守綬守
維俱國子生女適鳳翔千戶白豸孫子五塘州學生次珙
瑤瑁瑄女二公塋卜以卒之年閏十二月初七日而兆在
州城北原啓周夫人墓與合塋公事父母孝居喪哀毀封

君之沒也奉其治命悉以所遺衣物與諸兄弟又為伯兄
通及少弟時用翰粟授義民爵仲弟慶早逝遺妻趙氏及
二孤守緒守纓守纓纒兩歲耳公養為己子教之讀書庚
午舉鄉試乃不幸死守緒亦與授義民爵而趙氏老貞節
云公與郎中張天叙主事馬以乾交愛甚至也乃二人者
不幸皆夫婦客死南都公皆為棺殮歸其喪撫其遺孤而
主事之子某今舉進士視公如其父不忘往年公為僉事
九思以布衣游大梁公見之甚喜待以上賓之禮遣守經
從而授易比入仕問訊不絕公歸二年而九思亦罷歸禮
舍嘗謀西拜公不果周夫人守經之卒皆予為表其墓今

年春守純請予文壽公至是周夫人之姪州學生守來訃
且持叅議閻君欽述公世行致守純等之言曰願為銘鳴
呼予尚忍銘公哉昔韓退之謂未四十年而哭馬少監祖
子孫三世今予未三年而哭公父子于人世又何如也銘
曰吳嶽巖巖鍾靈孕賢于李則偏高郵孔仁按察是因以有
封君封君施畜于公其食其來嶷嶷維公克忠克憲克庸
陟于司空來迓孫子翩翩其樂衍衍既壽而淪如嶽之尊
名以永存

明故資政大夫南京工部尚書洪公墓誌銘

公諱遠字克毅姓洪氏徽州歙縣人系出唐河北黠陟使
諱經綸之後宋少師禮部尚書諱中孚十一世孫大父諱
壽父諱寬以鄉舉歷知桂陽鄭二州俱累贈南京都察院
右都御史大母江氏母汪氏俱贈夫人公少願異好學讀
書必成誦督學御史戴公珊奇之成化甲午舉鄉試復講
學于內翰謝公遷之門戊戌舉進士授蒲田知縣前尹妻
苦勢家請託公于廳事後置鼓客來坐未定連擊鼓者三
群吏鷹行進立侍即有請託者屏息不得出一語去蒲地
濱海海賊時發輒損戍兵巡海憲臣議僉民壯代之公力

言不可乃止。碁年丁內艱。旣去而莆人思之。甲辰改濬縣
歲荒。極力賑濟。全活甚衆。議者以濬大。欲分隸。湯陽濬人
謹曰。是使我離慈母。去吾不忍也。再踰年。丁外艱。弘治庚
戌。改交河縣。其惠政如前。兩邑尤加意學校。公暇親為諸
生解講。文義不倦。部使者交章薦之。甲寅。徵授南京福建
道監察御史。數言事。不避權貴。庚申。陞浙江按察司僉事。
歷巡五道。所至以鋤豪強。撫孤。箴佑良善為先。務壬戌。兩
浙饑。公分賑嘉湖。檄富鄭公。青州朱文公。浙東舊法。參酌
行之。二郡獨無流殍。巡視憲臣。疏其事。有羊酒之賜。甲
子。轉副使。巡海道。按察使缺。攝司事。且一年。諸道肅清。先

後巡按者列上其治行正德丁卯詔裁方岳剝員調湖
廣時有兩制使在楚一督逋負操切嚴急公下令勿亟民
不忍累公爭先輸足一專賑饑擇官分理獨委公以全楚
之半已己晉廣西按察使廣西郡縣多土官簿書期會徃
徃牽制或至十數年不結公嚴為之限於是辨治如中州
魚復敢後者庚午遷四川右布政使時盜賊充斥百務控
愆公攝左轄慎出納節冗費績羨餘萬餘緡悉以給軍餉
總制及巡撫諸公皆賢之辛未晉陝西左布政使尋擢都
察院右副都御史巡撫雲南獎廉吏出貪鄙遠徼以安十八
寨夷舊常剽奪為邊患公至皆出降或欲乘機擊之公不

可曰殺降不信置無辜于地死不仁掩其無備而襲之不
武諸夷聞之益畏服部內有銀礦開則攘奪並起公秘之
三載遂定鎮守中貴誅求害人公數抑之屢欲中傷索公
無可得乃己甲戌改南京大理寺卿獄情深求者多所平
反乙亥轉南京都察院右都御史諭諸言事者務存大体
切時勿以詆訐為事御史林有年諫取佛忤 旨逮赴
詔嶽率臺官上疏救之己卯三載考緒在道拜南京工部
尚書徑趨闕下謝且辭 優詔答之有清譽素著之褒還
任越三日即疏乞休致會有江西之變南京調兵備禦凡
器械悉取之工部公時已疾作勉強視事勞瘁日甚遂至

不起實七月一十四日也距其生景泰庚午十二月十六日得年七十訃聞上悼之命禮部諭祭者再工部治塋域公體貌重厚事親孝謹服喪哀毀踰禮每道過家拜墓上輒涕泣如初喪與兄達司務迪弟知州通極相友愛守官以三事稱出入四十餘年如一日當逆瑾用事時馳驅遠方而處之裕如無所附麗待僚友和而能諍馭屬吏嚴而怒好汲引善類有所推轂亦不使人知之性儉素寡嗜慾雖貴如寒寒終身無侍姬疾革子佺問以家事不答但曰爾輩兄弟惇睦以忠孝立身足矣語畢正衣冠而逝蓋公於朝食時猶對部屬處分公事相去僅七八刻耳其靜

定不亂如此元配吳氏繼程氏俱贈夫人子男四伊以家
學舉鄉試侂國子生脩俊司務佺郡庠生女二長適吳楫
次適胡墀孫男五詔誥訓誨謹孫女 以卒之明年 月

日塋歛覆鍾山之陽先事侂奉南京禮部右侍郎揚公方

震狀請予銘予與公舉進士為同年相知最深義不可辭
銘曰 洪望于歛遠有端緒由唐而宋官業世繼公以制
舉令尹三仕徵拜留臺侃侃論事不避貴權我職在是再
遷兩浙察其吏治救荒于西東則巡視其守不易效隨所
試移節湖南仍司法比乃以叙進廣臬正使風聲維揚孽
剔宿弊連轉方伯于蜀于秦薄正出納節財裕民治無近

名惠利則均中丞有詔持斧南巡肅之如秋煦之如春不
吐不茹安此遠人入為廷尉寃獄以伸總國之憲三尺是
循勿激以許勿隨以堙正已率屬諭之諄諄汝作司空
帝命方新禾盡兩月遽以訃陳為艱為瘁維時之因天子
曰吁失此舊臣善人嗟若維德之隣厥德未亡刻之貞珉

楊廷和撰



浙江圖書館

明故進階一品服帶榮祿大夫工部尚書蒲川龔公

墓誌銘

李充嗣撰

正德辛巳工部尚書龔公致仕歸吳後五年為嘉靖丙戌
卒于家訃聞

上命工部遣官造塋諭蘇州府祭塋得日其子正先期齋
大中丞礪庵毛公狀詣宦邸請銘曰先人待以不朽余接
之悻懽憶髫鬣時從先君承乏嘉定縣博與公處善及長
又同官侍 朝知其行悉義弗克辭遂揮泪頓允按公姓
龔氏名弘字元之蘓之嘉定人也以里名蒲華號川蒲其先
有慎儀公避地徙吳仕南唐為禮部郎中給事中子職在

宋首登仕籍官殿中侍御史識子四伯曰中元都官員外
郎仲曰會元叔曰紀季曰緯俱進士鄉人號兩脚書廚登
熙寧進士贈左朝大夫者宗元子程也登崇寧進士官至
祠部員外郎朝議大夫者程子況也況子明之紹興進士
以孝行聞明之子二長晁次晁晁子天定中咸淳七年武
進舉晁見朝運竄隆戒其子守宋曰家世宋臣矢勿事虜
以惕慘禍由是歷五傳皆隱耕六傳而至贈都御史古愚
公僕為公父 贈太淑人王氏為公母公生有赤蛇之兆
方四齡而能書里人沈翁異之請字以女即累 封淑人
者也比長攻苦力學領成化甲午鄉薦起家為戊戌進士

授嚴州府推官遇事刁迎縷解退直則肆志五經取陞南京刑部雲南司主事甚為司寇張公瑄所器重

孝廟初 誥階承德郎封父如其官母王氏配沈氏俱安人三年庚戌陞本部廣東司員外郎治獄九百五十二時稱平進南京文選郎中次年考察京官公在操行純固之列出守兗州府九年朝 京師 上旌治理尤最者七

人 賜宴 錫服以風勵在位公與焉十一年戊午考于吏部階中憲大夫加古愚如己官加王氏太恭人沈氏為恭人時邊城有警公預為之備賜幣以旌賢能辛酉陞浙江右叅政 勅理糧儲興疾南歸 魯王暨諸 殿下具

尊壘為詩文繪圖榮其行士民遮留號泣者以萬計至有
醮祭祈天者明年到任得告休養尋連丁內外艱家居
十三年累薦不起構三隱堂日惟著述教子孫所撰有方
外別誌嘉定縣誌而補水經作黃河或問續中吳記聞皆
未就正德九年甲戌起為福建右布政使明年改湖廣左
布政使秋在試院閱易禮春秋三經時稱得人冬陞應天
府府尹丁丑黃河溢山東守臣言狀廷議才識疏通大
臣一人往治之僉以公名上聞拜都察院右副使都御
史奉勅總理河患底定己卯兼理運道其秋扈駕南
征辛巳進工部侍郎兼都御史領勅如故是歲五疏乞

休俱 慰留尋加嘉議大夫又加祖父祖母父母妻如己
秩蔭孫世美入監冬再疏乞歸始獲 允旨曰卿歷任年
久才識老成既累次乞休情詞懇切陞工部尚書致仕着
馳驛還鄉壬午為

皇上嘉靖元年 詔階榮祿大夫一品玉帶三年 遣官
存問 賜白金一錠再諭年而公卒嗚呼公德為長者而
才有餘初在嚴富春有張姓者姑婦孀居資榷林以養里
人王侵奪其林孀莫之控訴行部至厥里忽群烏下遶公
車訝之廉得其情追以歸孀婦又金華府有金政一者兄
弟三人負其桀猾政一子殺人不能輸服政二潛繫以附世

交顯人之舟託申訴為由夜至平望命佚去以石投水曰
予姪溺矣衆拯之獲屍給公文輿歸七年不白公承委前
事集衆謂曰聞政一子生男果否衆曰然生幾年矣衆曰
已四齡公曰政一子死七年而男垂四齡其不死無疑
也置諸法一郡稱神在充廉明益著中貴李興奏功還朝
張甚公與相見長揖不屈衆危之其鎮巡劉大夏等稱嘆
焉興亦不能中也充州有借兌糧奇養馬課有司視為常
徵民不堪督公為照究遠年文卷知為額外及疏免糧萬
石馬八千匹公私俱蠲其他善政未易枚舉在充六年受
代之日病幾不起諸寮案檢厥囊將備後事得白金七兩

无他物遠近嘆異旣去餘四載民德之立碑於道事有不
決輒往說无不輸情其在閩猶其在兗也湖廣有巨璫縱
其奴殃民公命武昌守收收逮守畏勢依阿公輒身致府
獲首惡六十三人悉置於法璫為斂戢守亦引去應天歲
饑疏上乞賑濟民賴以完有中使差往西域所至擾害日
費百金及見公垂翼不敢肆 京師帖然扈 駕南征

江彬用事銜公抗已詭計中公者數矣而音不行非上
素所知公公素所樹立而能然欵公彌論中外四十餘年
而水蘄淬礪苞苴絕也政績卓異而譽延 睿聽 內庭
然也 列朝嘉尚而黜被存問金帛優也見幾明決而中

貴不懾於石介也完名全節而文獻超岷天荒破也投簪
著述公府不迹真三隱海仙也生於景泰辛未四月十八
日卒於嘉靖丙戌十一月十四日享年七十有六淑人沈
氏少公一歲先五年卒未葬子男二長即正娶徐氏次敬
崑扈庠生娶葛氏子女長適國子生蘇瓏次適范嵩孫男
六人世芳國子生世美恩生世英陰陽訓術世蕃世芹世
夔孫七人曾孫男二人正等卜以卒之二年三月十六日
與淑人合葬于蒲華里

欽建新塋銘曰

邵武開宗籍吳拱唐丁運不造再蹶再昌盤鬱兩宋譜秀

校香鴻我明士實胚前光厥起孤生爰執朝列才優讞
獄發奸破黜兩典西曹聲聞烈烈出守東郡民和士悅浙
叅不究起轄大藩于閩于湖德政播播爰尹京兆爰陟臺
端宣房奏屢寵

皇言司空八座術優以國老還休里閨生有羨恩
沒有餘矜伊誰使之名德无間翳以靈原松柏維燦式爾
邦人起敬起憚

浙江



浙江圖書館

浙江圖書館
藏書

資善大夫南京工部尚書贈太子太保半山叢公傳

泌陽焦希程撰

叢蘭字廷秀號半山文登人剛介謹慤天性孝友稍長即
知務學志節不群嘗曰苟足以濟人利物雖一命之士亦
可初授戶科給事中首疏以斥異端自是爭論事宜指斥
權奸如梁方汪直李廣輩抗論剴切無少避忌居父喪哀
毀諭制服闋轉兵科右給事痛革占隱宿弊陞通政叅議
北虜犯塞命經畧紫荆倒馬等關正德丙寅丁內艱值歲
大饑盡輸其餘粟以濟貧旅全治甚衆服闋以右通政清

查延綏屯田時有竊弄政柄者多事擾人毅然不少曲從
䟽時務十事曰急賞賚以勵人心曰免刑陪以寬職官曰
周顧慮以作銳氣曰緩催徵以安逃竄曰優武士以召謀
勇曰陞有功以期後效曰公考察以黜貪酷曰通坐派以
濟供用曰遵律條以安士庶曰禁校尉以靖邊方逆瑾敗
擢戶部右侍郎兼僉都御史總督寧夏糧儲未幾勅提督
固靖等處軍務益修戎政邊徼以寧辛未詔回京適流賊
猖獗廷議以中都根本重地命巡視之乃奮忠義以倡士
卒賊至浮斬及溺死者甚衆捷聞賜勅獎諭師旋賜宴禮
部加俸廂子及金幣之賜霍丘為立生祠癸酉北虜入寇

巡視西路宣大有警復總都糧餉進右都御史總制四鎮
故事權要多奏帶叅隨以圖僥倖公揚言於朝曰吾將斥
逐妄冒由是權要多怨謗既至邊相度夷儉更定號令後
人咸遵守之同事中貴張永輩惡其異己陰令都督王瓖
數毀於上上亦庶其為誣尋督漕政兼巡撫中貴不能干
以私益多毀之者未幾以江洋盜起易勅職專巡撫丙子
主事王銓忤近侍史宣下獄奏論數百言遂貫銓罪復其
官人以為有回天之力丁丑中貴劉允往烏思截取佛八
屬境劄令促其行且䟽毀佛氏乞召還出使外夷內臣以
端人心因留中不下淮安連歲不熟奏留運糧數萬餘石

大發帑藏及以義勸亦幾萬金立法賑貸活者數萬人有
漕運錄行於世平生不喜私謁不置側室累疏求退溫詔
勉慰聞陞南京工部尚書遂東歸今上即位陞俸一級具
疏乞休凡三上乃允賜勅褒諭年六十八以疾卒于家祭
葬如制贈太子太保嘉靖三年巡撫都御史王公以司府
縣議請以木主入鄉賢祠移文以原議載於志今從之

資政大夫南京工部尚書謚康簡崔公神道碑

安陽崔銑撰

公登成化甲辰進士明年乙巳授刑部主事又六年弘治
庚戌晉員外郎明年辛亥晉郎中又八年戊午晉河南按
察副使閱七年甲子晉山西布政丁內艱遂丁外艱至正
德庚午再除河南是年秋再晉至左布政使壬申晉南院
副都御史督糧乙亥晉工部右侍郎嘉靖癸未晉右都御
史遂晉南京工部尚書明年甲申引年致仕公蓋七十有
四公自部曹至端揆清潔恪厚精完神壯蒞事勤敏中夜
益辨施設舉措必歸於矜慎寬淳以庶於教化麤衣菲食

一切安於儉陋性成履素不為聲章泯德忘勞不較彼己
天下同推為鉅人長者公三蒞我汴在臬銑自大學歸省
在省銑待罪史官長工部銑叨南京雍師公之德固所炙
也公之政固所見也弘治初安福劉遜敢推強家而折橫
藩知武岡州減岷府祿米為所構惡公以郎中奉旨往勘
知州左秩而祿米亦削白遜誣罪公司刑久事來一鞠而
得過疑獄即立辯結要則從寬律嘗出俸貲買檜植庭中
囚侯訊者免夏日之酷在副使出巡部求民所利病為之
罷且舉凡獄已得侯保可止逮其相敵者餘放還封丘田
為河壞者三萬畝六十年民猶陪租公奏而除中年田惡

惟邑南萬畝肥然北阻城三回阻陵阜歲瀦水民取蓮暨
魚供稅公相田南有缺口乃弘之水得入河田乃歲有秋
又鑿城為孔二置鐵戥泄水城中亦免沮洳云封丘嘗遭
亂軍冊多竄名者公究鈎之實免百人湯陰常璽收官銀
如竊八十兩以逃璽坐償無從辦在係歷年妻乞食以食
公謂知縣曰吾無能生此囚必也得藏錢乎即有以掘地
得錢者相歐傷來訴公治罪遂白上官以錢贖璽而釋之
溫縣知縣盜庫金有奧授歸盜於高黑哥庫子也亦係累
年家人被累死公在布政命縣釋黑哥止以追銀完帖止
之省而節取餘銀代輸此二事用意宛轉以情傳律於平

仁哉往年闔省大戶告事竣布政追餘銀又罰紙名咨者
蓋上楮也公不然吏告紙乏乃取舊冊覆之為藁惟之憲
公者乃用咨什省七之費辛未薊寇亂河南守臣議闔省
摧軍費公謂非計之發省帑之羨明年上出內帑十萬令
賊平公猶以餘銀還京師公既廉約精於吏事詳於計筭
吏胥無以售奸日夕惟思公之遷去而不怨其嚴在山西
太原舊配雲南者數百人有旨改內地而籍未除有司猶
解補凡徃胥無生還者公自憲臣移文雲南憲臣同奏去
其籍在督糧改草廠於琵琶山既在城中又附倉緩急易相
濟然琵琶山久據於權人公怒取之論者曰尤難在大司空作

器用敝在玄津西旣可嚴防且無藥上供又奏免造海船
具數者公旣退十年是為甲午十有一月九日卒享年八
十有四公以景泰辛未二月二十有八日生公諱文奎字
應宿高祖諱三公曾祖諱士元祖諱瑾父諱榮祖暨父累
贈尚書祖母張氏母劉氏累贈夫人配杜氏累封淑人贈
夫人子五繼先紹先知縣懷忠懷恕學生懷恩女六人壻
童英王守卿和士傑徐敷郭洋孫男二女七曾孫男四女
二懷恕來鄴乞言曰將以歲丙申二月十有一日葬與杜
夫人同非往年上命官所域者文曰沂維公先新泰其遷
厥世維延相君是生維冰其清維直斯繩民曰怙恩訟曰

無寬帑積源源人憚我馳人競不咨厥比維宜受爵聿厚
德施孰疾及耄聿茂政民思之德士師之聿考茲碑

浙江圖書館

資善大夫南京工部尚書東湖吳公神道碑

增城湛若水撰

吳公諱廷舉字獻臣號東湖其友生今壽府長史梁君宗烈景行甫狀曰公先世湖廣嘉魚人洪武間遣戍九江又調廣西蒼梧所遂繫籍焉公梧產也自幼不與常兒群手不識戲弄口不道惡言父諱某母某氏長伯某無子命為嫡嗣以承宗祧稍長充邑庠生雋穎超邁書再讀不忘隨意為文亦合程度中鄉試登成化丁未進士第來宰順德公事暇即見白沙陳先生往返數載得聞理學梗槩為治根本又學為詩亦就規矩其治邑有道理民甚便之市舶

太監嘗以銀委買葛布充貢公即用其銀買二匹自送於
司曰承委買布不識可否先買二匹為式倘以為可買之
如不可即還原價買於雷州此布出自雷州非吾邑所有
也太監不悅蓋舊買貢物縣率令民買辦而以原物完封
納還故公獨不從有使者道經順德索其人事夫馬柴薪
以為常例公寧挺身與之角卒不與以病其民六載陞四
川成都府同知治繁劇理盤錯無不迎刃而解撫巡布按諸
公交重之丁母憂服闋改松江府到任數月廣東南海清
遠二縣群盜擾亂兵部尚書馬公文昇東山劉公大夏薦
公可用遂命為兵備僉事分司清遠征十三村池水諸峒

平之又廉屯田鹽法時瑾逆專權作威差官查盤諸省庫
銀解京額外索取內進人奉賀禮銀若干衆以為當出於
鹽法道公力拒之列疏于朝留備兩廣兵興之資彼雖甚
怒而未有以罪也岷府差門正往江西福建廣東收買藥
物橫奪暴取公又疏劾之瑾愈怒令總鎮伺察其過公又
疏劾總鎮太監潘二十餘年總鎮亦誣訐之逮繫詔獄必
置死地考掠數日無所得乃以枉道還鄉罪之枷號于吏
部門外九日死而復生謫戍鴈門逾月遇宥放還為民瑾
誅直其誣陞雲南副使未行江西桃源洞賊發乃陞右叅
政徃撫征之公即行一以誠信開諭徃返不以兵自衛賊

因留公於巢以求撫且劫公公不為動開諭如初賊不敢
加害公稍以利賄賊之左右有力者賴以執賊首數人因
賊成功卒以平定蔬立萬年縣陞廣東右布政使疏處番
舶進貢交易之法彼此調停甚得經遠之猷定均平省驛
遞民困以舒嶺西道徃犇嘯聚命兼兵備副使專意經畧
尋陞都察院右副都御史賑濟湖廣民不阻飢處分辰州
土官積年爭殺事理各得其宜嘉靖改元下詔更張政令
改用人物陞公兵部侍郎公至京上疏自劾以及宰輔立
朝五日改南京工部侍郎轉戶部尋陞右都御史巡撫南
畿賑濟凶荒均補糧運扶植柔弱抑遏豪強一切稱貸債

利罷不逾時所至行臺內有餘地令人種植蔬菜采以自
給每日廩給止柴米鹽醋內食必以廩米市之悉除積年
無藝之供應陞工部尚書時年六十四矣即再疏於朝飄
然而歸歸二年以病卒于正寢囊橐蕭然巡撫姚公經理
其棺槨衣衾乃得卒歛嗚呼行端而才雄氣剛而志銳忘
身致主憂國愛民公無愧矣創有東湖書院積古書萬卷
每遇夜必閱數卷乃就枕平生所為奏疏數百篇案牘幾
千篇書啓序記千餘篇詩千篇皆發其感事憂時之意罕
為閑浪不輕之詞元配夫人馮氏繼夫人梁氏俱受封贈
子一人曰藩太學生甘泉子曰梁壺山長史旣為此狀懇


予為神道碑文又欲解官走倉梧經營其塋事可謂交道
不以存歿易者也東湖公平生以國士待壺山壺山之知
東湖與天下士大夫之所共知者宜有淺深也今壺山之
稱東湖可以傳信矣水也亦嘗受公之知謹因壺山請
狀而作文刻之墓道以昭示來世其辭曰浩浩東湖節節
蒼梧哲人降生申甫為徒惟申惟甫亦文亦武惟以附衆
惟以禦侮其才其傑浩浩節節探而愈出百屈不折遍身
是贍皮囊是智人當其難公處則易初尹順德強禦是抑
公用乃紓民以不蹙去佐成都如丁解牛省府皆傾盤錯
魚留爰司鹽法臨財若怯峻拒權貪惟以賈孽九關三木

起死既培遂成爲門生歸乃復姚源即式挺身賦中用寇作禦
因敗成功藩廣賑楚民獲其所饑者飽嬉掠者安堵初
召荆下選不少假抗章忤時五日司馬冬官南京再二
司徒都憲撫南強鋤弱扶司空正卿不拜而行人皆曰亢
公視則輕公曰予正己丘而斃仕其死生誠哉無愧


浙江




浙江圖書館



浙江圖書館



浙江圖書館



浙江圖書館

浙江圖書館善本

甲 登記號：006669

一九 年 月 日



浙江圖書館

colorchecker CLASSIC



xrite



